

प्रादेशिक समाचार एकांश  
आकाशवाणी रायपुर (छत्तीसगढ़)  
प्रादेशिक समाचार बुलेटिन  
(छत्तीसगढ़ी)

18.10 रविवार

दिनांक 01.03.2026

\*\*\*\*\*  
मुख्य समाचार –

1— महासमुंद जिला म आज नौ झिन माईलोगिन समेत पंद्रह माओवादी मन ह पुलिस के आगु करीन आत्मसमर्पण ।

2— छत्तीसगढ़ समेत देसभर म आज ले जनऔषधि सप्ताह मनाय जावत हे ।

अउ

3— मौसम विभाग के मुताबिक बस्तर म अवइया बारह घंटा के दउरान गरज-चमक के संग हल्का ले मध्यम बरसा होय के संभावना ।

-----

माओवादी आत्मसमर्पण

महासमुंद जिला म आज नौ झिन माईलोगिन समेत पंद्रह झिन माओवादी मन ह पुलिस के आगु आत्मसमर्पण करे हे । एडीजी नक्सल ऑपरेशन विवेकानंद सिन्हा ह बतइन कि ए जम्मों माओवादी मन उपर कुल तिहत्तर लाख रुपिया के इनाम घोसित रिहीस । एमा स्टेट कमेटी सदस्य विकास घलो सामिल हे, जेखर उपर पच्चीस लाख रुपिया के इनामी घोसित रिहीस । विकास उर्फ सुदर्शन बछर उन्नीस सौ पचयासी ले तेलंगाना जोनल कमेटी म सक्रिय रिहीस । उहें, दस बछर तक ओहा सब जोन के सचिव पद म काम करे हे ।

श्री सिन्हा ह बतइन कि आत्मसमर्पण के दउरान माओवादी मन ह अपन चौदह हथियार ल घलो पुलिस ल सौंपे हे । एमा तीन एके-फोर्टी सेवन, दू एसएलआर, दू इंसास, चार श्री नॉट श्री रायफल अउ बारह बोर के बंदूक के

संगेसंग ऑटोमेटिक हथियार सामिल हे। ए जम्मां माओवादी बलांगीर—बरगढ़—महासमुंद डिवीजन म लंबा बेरा ले सक्रिय रिहीस हे।

अधिकारी मन ह बतइन कि आत्मसमर्पण करइया माओवादी मन ल राज्य सरकार के पुनर्वास कारीकरम के फायदा मिलही अउ ओमन ल समाज के मुख्यधारा म सामिल करे जाही। विज्ञप्ति म दावा करे गेहे कि ए आत्मसमर्पण के बाद माओवादी मनके ओडिसा स्टेट कमेटी के पश्चिमी सब जोन पूरा तरह ले सिरागेहे। एखर संगेसंग ओडिसा के संबलपुर रेंज घलो नक्सलमुक्त हो गेहे।

खबर के मुताबिक बैनर—पोस्टर के अलावा आने—आने माध्यम मन के संगेच आकाशवाणी के माध्यम ले घलो माओवादी मन ले आत्मसमर्पण करे के अपील करे गे रिहीस।

ऐति, सुकमा जिला म आज सर्चिंग के दउरान सुरक्षा बल मन ह ताड़मेटला अउ जगरगुंडा के जंगल म माओवादी मन डहार ले बनाय गे सिविर ले बीस किलो वजनी आईईडी समेत बिस्फोटक समान अउ माओवादी साहित्य बरामद करे हे।

### हाईकोर्ट—सौम्या चौरसिया जमानत

छत्तीसगढ़ उच्च न्यायालय ह सराब घोटाला मामला म पूर्व अधिकारी सौम्या चौरसिया ल जमानत दे दे हे। अदालत ह दूनो पक्ष मनके दलील सुने के बाद ए फइसला सुनाय हे। न्यायालय ह सर्त के संग सौम्या चौरसिया के जमानत ल मंजूरी देत किहीन हे कि आरोपी जांच म मदद करही अउ बिना अनुमति प्रदेस ले बाहिर नइ जाय।

### जनऔषधि सप्ताह

छत्तीसगढ़ समेत देसभर म आज ले जनऔषधि सप्ताह मनाय जावत हे। सात मार्च तक चलइया ए अभियान के तहत प्रदेस म हफता भर जागरूकता ले जुड़े कतकोन कारीकरम कराय जाही। राज्य के आने—आने जिला मन म स्थित जनऔषधि केंद्र मन म घलो बिसेस सिविर लगाय जावत हे। ए सिविरि मन म मरीज मन ल जेनेरिक दवाई मनके फायदा उंखर गुणवत्ता अउ कीमत म अंतर के जानकारी दे जावत हे। उहें, कई ठिन जघा मन म निसुल्क

स्वास्थ्य जांच सिविर घलो आयोजित करे जावत हे। स्वास्थ्य विभाग ह लोगन मन ले अपील करीन हे कि ओमन प्रमाणित जेनेरिक दवाई मन ल प्राथमिकता देवय।

खबर के मुताबिक हे कि ए बछर के थीम “जनऔषधि—सस्ती भी, भरोसेमंद भी” हरय।

### राष्ट्रीय विज्ञान दिवस—कार्यशाला

राष्ट्रीय विज्ञान दिवस म रईपुर स्थित विज्ञान केंद्र म हाइड्रोजेन रॉकेट कार्यशाला अउ नाइट स्काई गेजिंग कारीकरम के आयोजन करे गीस। छत्तीसगढ़ रीजनल साईंस सेंटर अउ छत्तीसगढ़ विज्ञान अउ प्रौद्योगिकी परिषद के समलात म राखे गे ए कारीकरम म आने—आने सरकारी विद्यालय मन के छात्र—छात्रा मन भाग लीन।

कारीकरम के सुभारंभ करत हुए सुप्रसिध्द वैज्ञानिक एम.के.बेग ह डॉक्टर सी.वी.रमन के ऐतिहासिक खोज “रमन प्रभाव” ल भारतीय विज्ञान के वैश्विक चिन्हारी के आधार बतइन। ओमन किहीन हे कि विज्ञान सिरिफ ज्ञान के बिसय नहीं, बल्कि नवाचार, तर्कसीलता अउ राष्ट्र निर्माण के सशक्त धुरी हरय। ओमन विद्यार्थी मन ले आह्वान करीन हे कि ओमन वैज्ञानिक सोच ल अपनाके अंतरिक्ष प्रौद्योगिकी अउ उभरत शोध क्षेत्र मन म सहभागिता निभावय। ए दउरान आयोजित कार्यशाला म विद्यार्थी मन ल हाइड्रोजेन रॉकेट के प्रत्यक्ष प्रक्षेपण करके दिखाय गीस।

### होली स्पेशल ट्रेन

होली तिहार के दउरान यात्री मन के सुविधा ल धियान म राखत दक्षिण पूर्व मध्य रेलवे डहार ले सत्तर होली स्पेशल ट्रेन के परिचालन करे जाही। एमा ले चौदह ट्रेन दक्षिण पूर्व मध्य रेलवे ले संचालित होही। उहें, छप्पन ट्रेन आने—आने स्टेसन ले होके जाही।

राजनांदगांव अउ डोंगरगढ़ रेलवे स्टेसन ले घलो कतकोन स्पेशल ट्रेन चलाय जाही। दुरुग—हजरत निजामुद्दीन, गोंदिया—छपरा, दुरुग—मधुबनी अउ गोंदिया—पटना होली स्पेशल ट्रेन के रूके के राजनांदगांव अउ डोंगरगढ़ स्टेसन म दे गेहे।

उहें, गोंदिया—छपरा स्पेशल, गोंदिया—पटना स्पेशल अउ बिलासपुर—चर्लपल्ली स्पेशल ट्रेन के स्टापेज राजनांदगांव अउ डोंगरगढ़ म रहड़ी।

### मुख्यमंत्री—फाल्गुन महोत्सव

मुख्यमंत्री विष्णुदेव साय आज राजनांदगांव जिला के डोंगरगढ़ स्थित नादिया के प्राचीन कबीर साहेब मठ म आयोजित अखिल भारती सद्गुरु कबीर संत सम्मेलन अउ तीन दिवसीय फाल्गुन महोत्सव म सामिल होइन्। ए दउरान मुख्यमंत्री ह मठ पहुंचके संत मन के आसीर्वाद लीन अउ कबीर साहेब के बिचार ल समाज बर मार्गदर्सक बतइन्। ए मउका म श्री साय ह मठ परिसर के विकास बर एक विसाल डोम अउ मिनी स्टेडियम के निर्माण के घोसना करीन्। संगेसंग फाल्गुन महोत्सव के नियमित अउ व्यवस्थित आयोजन बर राज्य बजट म बिसेस रासि उपलब्ध कराय के आस्वासन दीन्।

### भानुप्रताप—मैराथन दौड़

कांकेर जिला के भानुप्रतापपुर म आज मैराथन दौड़ के आयोजन करे गीस। ए दउड़ म प्रदेस के आने—आने जिला मनले पहुंचे धावक मन ह भाग लीन्, जेमा चार झिन आत्मसमर्पित माओवादी घलो सामिल रिहीस। पुरुष अउ महिला वर्ग म राखेगे ए मैराथन म भिलाई के प्रतिभागी मन ह पहला स्थान पाय हे।

कारीकरम म विधायक सावित्री मंडावी मुख्य अतिथि के रूप म सामिल होइन्। ओमन मैराथन ल हरियर झंडी देखाके रवाना करीन्। अपन गोठबात म ओमन किहीन कि खेल समाज ल जोड़े के सशक्त माध्यम हे अउ अइसन आयोजन मन ले युवा मन ल साकारात्मक दिसा मिलथे।

ऐति, भिलाई म आज राष्ट्रीय सुरक्षा दिवस म राखेगे जन—जागरूकता रैली म भिलाई इस्पात संयंत्र के कर्मी अउ स्कूली लइका मन ह बढ—चढके भाग लीन्।

### हाथी आतंक

सुरजपुर जिला के प्रतापपुर वन परिक्षेत्र म आज अट्टारा हाथी मन के दल ह तीन झिन गांव वाले मनके घर ल तोड़ दीस। उहें, बाड़ी मन म लगे फसल ल घलो रौंद दीस। वन विभाग के टीम मउका म मौजूद हे अउ हाथी

मन ल जंगल कोति भगाय के कोसिस करत हे। वन विभाग ह प्रभावित परिवार मन ल राहत रासि दे के काम सुरु कर देहे।

### मौसम

मौसम विभाग ह बस्तर संभाग के कुछेक जिला म अवइया बारह घंटा के दउरान गरज—चमक के संग हल्का बरसा होय के संभावना जताय हे। मौसम विभाग के मुताबिक उत्तरी छत्तीसगढ़ म एक पश्चिमी विक्षोभ सक्रिय हे, जेखर सेति प्रदेश के कुछेक जिला मन म बदली छाय रइही। उहें, अधिकतम तापमान म गिरावट दर्ज करे जा सकत हे। मौसम वैज्ञानिक ह किसान मन ल सलाह दे हे कि ओला खुला म राखे अनाज ल सुरक्षित जघा म पहुंचा दे।

### संक्षिप्त समाचार

— बिलासपुर नगर निगम ह आज अरपा नदी के तटवर्ती क्षेत्र मन म रिवर फ्रंट प्रोजेक्ट के तहत अतिक्रमणकारी मन ल नोटिस जारी करके सात दिन के भीतर हटाय जाय के निरदेस दे हे।

— धमतरी म आज होय जल उपयोगिता समिति के बइठका म अवइया रबी फसल के सिंचाई बर गंगरेल बांध ले पानी छोड़े के रूपरेखा तय करे गीस।

— रईपुर के माना स्थित स्वामी विवेकानंद विमानतल म सुरक्षा व्यवस्था के जायजा लेबर आज 'फुल स्केल इमरजेंसी ड्रिल' के आयोजन करे गीस। एमा सीआईएसएफ, अग्निशमन दल अउ स्वास्थ्य विभाग के दल ह भाग लीन।

— छत्तीसगढ़ व्यावसायिक परीक्षा मंडल—व्यापम डहार आज प्रदेश म डीटीपी ऑपरेटर अउ ग्राफिक्स डिजाइनर पद मन बर परीक्षा आयोजित करे गीस।

— रायगढ़ जिला प्रशासन अउ खनिज विभाग के टीम ह आज खरसिया क्षेत्र म कोयला के अवैध परिवहन करत चार ठिन ट्रक मन ल जब्त करे हे।

अउ

— राजनांदगांव—दुरूग रद्दा म आज बिहनिया एक तेज रफतार ट्रक ह फटफटी ल टक्कर मार दीस। ए हादसा म दू युवक मन के मउकच मउत हगे, जबकि एक झिन युवक गंभीर रूप ले घायल हो गेहे।

\*\*\*\*\*